



Орган Лемковского Союза.

Выходит в каждый четверг.

Редакция и администрация в Крынице. — Адрес „Лемко“ Крыница.

Всіх читателей, котры не вплатили ище пренумераты, просиме выровнати якнайскорше рахунки.

Пренумерата в краю:
30 грошей місячно,
80 „ квартално
1*50 „ полрочно,
3 зл. рочно.
В Америкі: 1 дол. рочно.
В Чехословакии:
2 кор. місячно, 10 кор. полрочно,
20 кор. рочно.
Ціны оголошень:
Ціла сторона 120 зл., 1/2 сто-
роны 60 зл., 1/4 стороны 35 зл.,
1/8 стор. 20 зл., 1/16 стор. 10 зл.;
оголошення малы за 1 мм. 20 гр.,
в тексті 30 гр., перед текстом
40 гр. При місячном и долшом
оголошеню значна знижка.
.....
Контото чекове Нр. 404.155.

Не ходме люзом!

Каждый с нас мусит признати, же оден человек, хоц бы и як мудрый и трудолюбивый, не може много зробити. Знают о том работники, купцы, промышленники, урядники и инши и основуют ріжны союзы, котры боронят их клясовых справ и дбают о того, штобы выбороти для своих членов якнайкористнійши права.

Найслабше организованы сут селяне и прото, хоц их ест в Польщі найвече, никто с нима ся не числит, их товары маот низку ціну и каждый их выкористуе. Народ на селі нарече на злы часы, але нарече потихы и его наріканя никто не чуе, а коли аж и дакто смілійший отозве ся часом голоснійше, то всі бесідуют, же недовольны сут лем одыницы, а загал же припіваючи. Зрозуміла річ, же в таких случаях всі признают смільчака, котрый голосно выразил ся о потребах села, за аномального, его просьба иде до коша, а народ дальше бідуе.

В часах поступу, в часах стальной организации всіх народов и кляс, наш бідный селянин ходит люзом и для него не существует клясова организация и солидарность. Тото помстит ся на самом селянині, бо жите ест тверде и безвлядне.

Видячи тоту равнодушность нашего села до организации и знаючи о том, што біда всім тым, котры остают ся глухы на призыв до клясовой солидарности, основано в Горлицах Лемко-Союз, товариство, маюче на ціли здысциплиновати и организовавати клясово наших селян и дати им возможность поднести ся культурально и экономично. Лемко-Союз не мал николи и не має политычных цілей, он никого не старат ся перекрестити, ани тыж не мішат ся в религийны справы,—его головном и одыноком задачею ест перевести организацию села и поднести его добробыт.

Значна часть нашего селянства зрозуміла

добры наміреня Лемко-Союза и станула в его ряды, але остали ище тысячи, котры треба освідомляти и захочати, бо они не видят того, же без организации роздавит их могуча сила сорганизованого и здысципливаного жита.

О асекурации коров.

Перед роком „Лемко Союз“ заявил, же выплатит в случаю смерти члена его родині 75 зл. В случаю втраты коровы, вола або коня, будучого власностью члена, мал Лемко-Союз выплачати втрагному членови суму 50 зл. Членска вкладка до Лемко-Союза выносит рочно для селян 2 зл., а для интеллигенции 1 зл. місячно, т. е. рочно 12 зл.

Коли я прочитал того всео, пришло мені на мысль, же так быти не може, бо никто на другого робити не схоче. Интеллигент платит 12 зл. рочно, хоц не має живины, а хлоп 2 зл. и в разі несчастья, треба ему выплатити 50 зл. Прото тыж не буде нич дивного, як Лемко-Союз не выяже ся с принятых на себе обовязков.

Але асекураційне товариство, где можна бы было заасекуровати коровы, ци коні, ест доконче потребне и повинно находити ся при Лемко-Союзі. Товариство таке однак треба основати отдільно, бо до него будут належати лем люды, котры маот коровы, або другу живину, — а способ основаня може быти такий:

Сходят ся господары на собранє и ухваляют вплатити одноразово уділ по 2 зл. от штуки и вписове 50 гр. За втрачену штуку живины буде платити товариство три четверты части вартости живины, усталеной через таксаторску комиссию, выбрану через обще собранє членов. Если н. пр. корову оцінено на 120 зл., то властитель достает

90 зл. Если корову на час дорізано, то скоро и мясо стаот ся власностью товариства. За продану скору и мясо достает т-во н. пр. 50 зл., то доплачат от себе лем 40 зл. Але откаль взяти тых 40 зл., котры однак треба выплатити?

Суму тоту роскладат ся на число заасекурованных коров и стігат ся от них в формі безотложной складки. Если в Т-ві ест заасекурованных 200 штук, то, штобы собрати 40 зл., оподаткуе ся каждую корову по 20 гр. Член, маючий одну корову платит 20 гр., а маючий 2, 3, 4 и т. д. коров заплатит 40, 60, 80 и т. д. грошей.

Як таксуе ся корову.

Таксуе ся ведля курсу дня. Таксаторска комиссия кличе одного, або двоих поважных господарей—сусідов и разом с нима розважат, килько треба заплатити за подобну корову на торзі и килько бы властитель одержал за ню, если бы хотіл ю продати. Як поступат ся, если має кто хвору корову.

Властитель хворей коровы доносит. председателю таксаторской комисии, же має хвору корову. Комисия рішат, ци корову треба дальше куровати, ци тыж лучше ю дорізати. Комисия также назначат вартость той коровы.

Если властитель коровы не згодит ся дорізати корову и хоче ю дальше куровати на свое рызыкю, втотчас дае ему цілковиту свободу, с тым застереженєм, же як корова здохне, то достает он не $\frac{3}{4}$, але половину належной ему сумы.

В яком часі выплачат ся потерпівшому гроши?

Асекураційну складку мусит каждый член вплатити в 14-ох днях. Если кто в том часі складки не вплатит, перестает быти тым самым членом товариства, тратит право до зворота уділов, а если хоче знова быти членом, мусит зложити новы уділы и вписове.

Поведенє таке ест правильное, бо трудно ждати цілыма місяцами, аж кому прииде охо-

та заплатити, а тимчасом потерпівший му-сит купити зараз корову, бо ціны идут вгору. За коровы, котры падають при отеленю, або в 8-ох днях погодивше платит ся пол-ну вартость.

Гроши собраны с уділов умішат ся в касі.

Заряд товариства.

Найвысшу власть має обще собранє чле-нов. Оно выберат заряд, т. е. председателя, заступника и секретара, котрый може быти также касиєром, контрольную комиссию и так-саторску комиссию, зложеноу с 3 членов.

Розуміє ся, што сут то лем головны чер-ты регулямина, якы мусіли бы быти ухва-лены на основательном собраню.

Основанє и существованє такого това-риства буде зависиме от усвідомленя селян, от того, як чуткы сут они на біду ближнего. Але таке солидарне отчутє несчастья сусіда може каждого охоронити перед великом втратом и за невеликы гроши обезпечити его перед несчастьем.

Пам'ятайте все, же всьо, што робиме, ро-биме для себе, бо што стало ся одному днеска, другому може стати ся завтра.

Андрей П.

Што діє ся в Кытаю.

Штобы хоц в головных чертах поняти тото всьо, што діє ся в Кытаю, треба до-конче памятати о том, што в Кытаю єст 420 миллионов населеня, а с того 60 мили-онов—то безработны. Три четверты кытай-ского населеня жиє на ґрунті. Половина ґрунту єст роздроблена на карловаты госпо-дарства. Кытайский хлоп терпит 4 біды, а тыма сут: бандыты, воякы, голод и тыра-ния панов. Хлопы дусят ся в долгах. По-даткы платит ся сгоры, гдекади населенє заплатило податкы уж за будучих 50 літ. Ніт коминикаційной сіти. Результат єст такый, же в одной закутині єст страшный голод, а в другой провинции населенє не може продати землеплодов.

Вызыск работников єст страшный. Робят они по 20 годин денно за заплату 3 раз меньше от заплаты работников японских, хоц тоты также достают о половину мень-ше от европейских работников.

Такы порядкы пануют в Кытаю и нич дивного, же тота нужда робочой клясы способствовала всякым розрухам. И тепер знова кыпит там всьо. Місто Кантон с ве-ликими провинциями єст опановане через комуністов, котры хотят злучити всіх кы-тайцов против Японии, а правительство нанкинске, в котрого главі стоит ген. Чанг-Кай-Шек єст под впливом кытайских капи-талистов, для котрых комунізм єст большом опасностью, як Япония.

Кантон посуджат Чанг-Кай-Шека о уступ-ства в виду Японии и завзывают до войны и против японским апетытам. Войска кан-тонскы вирушили уж на Шанхай. До-машна война в Кытаю здає ся неизбїжна.

Новы школы в Польщі.

Школьны власти змінили тепер совсем роды школ. Коли давнійше был лем оден тып гимназии, то тепер єст их барз много.

Сут гимназии купецкы, механичны, пря-мичны, фарбярскы, ткацкы и инши.

Тота зміна єст выкликана тым, же у нас за много людей кончит школы загального образования, котры приготавлиют молодеж лем до урядов, в наслідок чого в урядах єст переполненє, а бракує добрых купцов и ремесленников.

Тож штобы заохотити молодеж до ку-пецтва и ремесла, школьны власти основу-ют тепер купецкы и промышленны гимна-зии, котрых абсолювенты будут мати такы самы права, як абсолювенты гимназий за-гального образования. Могут они по окон-ченю школ закладати власны варстаты, але можут также поступати до школ лиц-альных а пак и на университет.

Єст то зміна безпорно користна, бо дає молодежи значно ширши горизонты заня-тя, шкода лем, же на разі открывають такы гимназии лем в Варшаві и Лодзи, а ніт их в жадном місті, положеном недалеко нас, где бы и наша молодеж могла выбрати собі школу ведля своєго уподобаня и спо-собностей.

Друга рочница смерти мин. Бр. Пєрацкого.

Дня 15. червня, в другу рочницу трагич-ной смерти министра Брон. Пєрацкого в Варшаві, отслужено в костелі Св. Креста торжественне заупокійне богослуженє, на котром присутствовали премиєр ген. Ф. Сла-вой-Складковский, председатель Сената С. Цар, члены правительства, генералиция и многы депутаты Сейма и сенаторы.

Того самого дня отслужено в Новом Санчі в парохияльном костелі богослуженз за упо-кой души бл. п. министра. На богослуженю были присутны кромі родины покойного, прибивши с Варшавы представителі ми-нистерства внутренних діл, воєвода Кра-ковский, плк. Гноинский, новосандецкий староста Д-р Лах, представителі всіх місце-вых урядов, школ и организации.

По богослуженю в костелі отслужено па-нихиду у памятника покойного министра и зложено на памятнику много вінков.

Клопоты Амерыкы с золотом.

Як відомо, Амерыка в часі войны и по войні скопила у себе праві всьо золото, яке находило ся на світі. Тепер она боит ся о тото золото и побудовала для его пере-хованя величезну кріпость Ноке, до котрой мають перевести золото с Нью-Йорка.

Золото мають перевести 50-ома автомо-билями.

Будова кріпости начала ся уж давно але была ведена в великой тайні и аж тепер, коли она закончила ся, амерыканцы дові-дали ся, где буде поміщене их народне богатство. Кріпость представлят великой чотыроугольный будынок, вокруг котрого на значной высоті иде балькон. В день и ноч по том бальконі ходит вооружена сторожа.

В середині того будынка находит ся дру-гой будынок, в котром ніт окон и не отраз можна найти двери. В середині другого будынка находят ся сходы, ведучи до пив-ниц. Пивницы сут зроблены с желізо-бе-тона. Они выдержат не лем напады ганг-стеров, але и бомбардованє тяжкой артиле-рии. Штобы злодіи могли добрати ся до тых подземельных комнат, мусіли бы пе-

рейти коло двох линий сторожи, а потом аж могли бы ся достати до дверей, грубых на пару метров, с сильными замками.

Але если бы аж и потрафили отворити тоты двери, што єст просто невозможне, те и так не достанут ся до золота, бо при открытію дверей автоматично отверають ся куркы и вода потоком заливат цілы под-земельны корытары и грабителі находят смерть.

Земна блышка на капусті.

На капусті пєявлят ся часто масово мала комашка, звана земна блышка. Выступат она масово особенно в часі сухой и сонеч-ной погоды и робит значны шкоды.

Штобы охоронити ся перед тым шкод-ником, належит поле накрыти мокрыма трачовинами або мокрым торфом на 1 1/2 см. грубо, бо удержанє ґрунту, засаженного капустом в мокрому стані отстрашат блышку.

Очистити капусту с земной блышки мож-на слідующим способом:]

Дошку около 1 м. долгу и 20 см. широку вішат ся на дручку так, штобы ю можна было добре нести. Берегы дошки обиват ся дост густо френзлями, а от споду сма-рує ся дошку ліпком течом, якої уживаме на мухы, тером, або иншом клеистом суб-станциом.

Таку дошку несе двоє людей над ка-пустом так низко, штобы фрезлі положили находячи ся на листках капусты блышки. Блышки зрывають ся и приклеюют до ліп-кой дошки.

По двох днях треба таким самым спосо-бом знова позбєрати блышки.

ПО ЛЕМКОВЩИНІ.

СОБРАНЄ ЧИТАЛЬНІ В ГАНЧОВІ.

На Русаля 31. мая отбыло ся в нас обще собранє членов читальні им. М. Качковского при численной участі місцевых людей и до-околичных гостей.

По открытію собрания председателем г. Вислоцкым и выборі презыдии в складі д-ра Сьокалы—предс. и Н. Федорка — секр. послідовала деклямація Параскы Проць „Вытаєм Вас“, а місцевый хор, под управле-нєм г. дыр. Полоциновича с Высовы, от-співал „С Богом братцы“.

По вступном слові председателя собрания д-ра Сьокалы, г. Вислоцкий предложил справозданє выдїла читальні и касовый от-чет за 2 остатны роки. Из докладов вы-яснило ся, што праца в читальні ишла добре. Аматорский кружок дал пару пред-ставлень, был организованый хор, библио-теку увеличено. Також с читальні вышла мысль заложения кооператива, котрый роз-виват ся барз добре и дає возможность уволь-нити ся от [вызыска місцевых жидов. В остатных часах назріла тыж справа бу-довы власного читальняного дому с великом театральном сальом и уж начаты подгото-вительны работы. По деклямациях „До рускых дівчат“ гарді и с чувством выголо-шенной М. Яцевыч и „Руска дітина“, выголо-шенной школярком, хор отспівал пісні „Ку-делица“ и „Колысанка“. Обі пісні выпали барз добре.

Тепер забрал голос г. проф. Максимовыч с Горлиц и представил повстанє. ціли и за-слугы Общества и читальнь им. Качков-ского. Особно бесідник познакомил при-

сутних с житєм и трудами нашего Просвітителя о. Наумовича в связи с 110-літнім ювілеєм его уродження и 45-літнім смерті. Бесіду тоту выслувано с вельком увагом.

По дискуссии и уділеню абсолютории назначено перерыв, в часі котрого выступал зас хор с піснями: „Гандзя“ „Курипочка“ итд.

В склад нового виділа выбрано: Никиту Дуду — предсід. И. Худинца — заст. предс., солтыса И. Гарагуза — секр., Т. Дурняка — кас. и М. Яцевич — библиот., а С. Юзкевича и С. Мучку — заст. членов. До контр. ком. ввошли: г. дыр. А. Вислоцкий, Ю. Проць и Г. Лукачин.

Заберали ище голос г. Полошинович — о розвитку читальні и поступі культуры села, г. Максимович о дальшой роботі в читальні, г. Вислоцкий и новый предсідатель г. Дуда. Тот остатный сердечно подяковал русской интеллигенции за участь в собраню и поучаючи бесіды, а долготітному многозаслуженому предсідателю уступившому тепер по причині працы в кооперативі — г. Вислоцкому отспівано многолітствіє.

Послідовавша цеклямація Петра Вандзильяка зробила миле впечатліє.

По концевой бесіді д-ра Сьокалы, в котрой он возвал ганчовян до дальшого упорного труда в читальні и пожелал успіха в будові дому — закончено собранє.

С в о й.

ЯСТРЯБИК, пов. Новый-Санч.

Наше невелике село, росшмарене под самом Яворином, найвысшом гором сандецкого повіта, (1116 метров), до недавна в мазепинских газетах числило ся „українським“, а то для того, що б. наш парох, тепер перенесеный на всход, о. Качмар, своим терором тримал наших людей в таком страху, што не можна было начати нияку руску роботу в селі. Маме ище одного мазепинца в селі, котрый, як выїхав Качмар с клібани, мусліл также опустити ей стіны, але не поїхал на „самостійну Україну“ за Качмаром, а остал в Ястрябику, штобы ту дальше ширити роздор в нашем народі. Тым добродієм єсть ем. учитель Трускавецкий, котрый зберат дальше у себе гдекого с наших глупых людей и посредством ширеня укр. книг и агитации старат ся розділити наше село на дві партии. Але надармо, бо наши селяне познали ся на „волках в овечой скорі“ и дня 7. червня в неділю отворили у себе руску читальню им. М. Качковскового.

Собранє отбыло ся в домі нашего честного господара г. Григория Тыліщак и притягнуло много людей, бо понад 100 особ, не рахуючи многочисленных гостей с околиц.

Не забыли также нас и наши интеллигенты с Криницы, Поворозника и инш., котры поучили нас, як має ся провадити читальняну роботу, як также поучили нас, што мы лемкы — руснакы, а не жадны украинцы, як нас до того часу туманили ріжны зайды.

До того часу не мали мы в селі ани одной русской газеты, бо наши опекуны спроваждали до села лем якыси укр. газеты, в котрых представляли нам вьсо на свой лад.

Собранє отворил с рамени „Лемко-Союза“ М. Трохановский и предложил выбрати презыдию, до котрой выбрано: войта г. Алексия Милянйча. Вписало ся понад 30 членов, установили вписове по 50 гр.

До виділа были выбраны: предсідателем — Григорий Тыліщак, заступником предсідателя — Петро Крегель, секретарем — Стефан Носаль, касієром — о. Василий Бартко, библиотекарем — Семан Слота, заступниками Васко Тыліщак и Семан Тыліщак, а до контр. комисси Ваньо Слота и Михаил Слота.

До собранных селян промовляли: М. Трохановский, котрый пояснил селянам чотиры девизы: „моли ся, учи ся, труди ся, трезви ся!“, котрыми повинны руководити ся всі рускы читальні.

Инж. С. Дуркот, бесідовал о значеню просвіты для нашего народа, што чит. єсть другом школом для села и завзывал учити ся и читати рускы книги и газеты.

Г-жа Е. Яновицка в своєй прекрасной бесіді доказала собранным исторычними фактами с русской и польской истории, што николи не было Украины, а была лем одна Русь, што наш народ николи не называл ся украинцами, лем руснаками, што тепер ріжны новіші „лжеисторыки“ перекручуют наше имя и нашу руску назву на „українців“, а вьсо, на шкоду рускому народу, а на добро всіх его ворогов.

Молода дівчина Евгения Милянйч, выголосила прекрасну промову, в котрой оповіла нам, як то в 1914 р. наши теперешны опекуны выдавали нашего хлопа на розстрілы и вішанє, як на их доносы в Верхомлі Вел. повішено 7 газдов, а в Перемішлі зарубали 40 наших мученников, в том числі молоду Марию Мохнацку.

Делегат Центр. О-ва оповіл цілу историю с том Украинном, як то вьсо творило ся чужими руками: австрийцов и німцов, а як тых не стало, то и Украины не стало, бо рускый народ не хотіл ділити ся. Бесідник завозвал всіх селян до єдности и поучил, як треба провадити читальняну роботу.

Наш парох о. Василий Бартко звернул ся до селян с горячим словом, в котром закликал селянство горнути ся до чит. и не слухати новых лжепророков, а всім обєднати ся под прапором чит. им. М. Качковскового.

Стеф. Циханский подчеркнул, што мы рускы лемкы тратиме для того, што мы не организованы и закликал до хлопской єдности под рускым прапором.

При конци собраня дівчатка со Щавника, Стефания Яценник, Олена Милянйч и Мария Костик отдеклямовали верши: „на могилі

Талергофца“, „привіт борцам за Русь“ и „Русь оживляє“, за што присутны нагородили их долгыма рукоплесканьями.

Ваньо с под Яворины.



КОЛХОЗНИКЫ ПРОДАЮТ ЗЕМЛЮ.

С Ташкента доносят, што газета „Заря Востока“ опубликовала документы о продажі землі в районі міста Орджоникидзе. В продолженю килькох місяцов т. р. было зарєєстровано 75 случаев продажи колхозной землі. Колхозники продают отданы им до управы землі.

Гидротехник машино-тракторной станции в Лебедыні продал таку землю за 2 тысячи рублей. Характерыстычне єст того, же всі акты купна-продажи землі были зроблены у нотарара в Ташкенті. Газету огорчат найбільше тот факт, же слідство по той причині веде ся барз поволи и же до того часу никто из виновных не был потягнений до отвітственности.



Лемкы с горлицкого повіта и околицы.

Приготовляйте ся и участвуйте [в Народном Празднику Талергофском и дні Руской Культуры! — Покажите себе! Посмотрте на пописы наших дружин, хоров, аматорских кружков и оркестр самородных музыкантов, які выступят в ТАЛЕРГОФСКОМ ПРАЗДНИКУ и ДНІ РУСКОЙ КУЛЬТУРЫ, в селі Баница, горлицкого повіта, в неділю, 12. липня т. г., в день св. ап. Петра и Павла, по случаю посвяченя

Талергофского Креста.

Уж тепер, а найдальше до 5. липня т. г. оголошуйте свои програмы в правленє читальні им. М. Качковскового в Баницы, почта Гладишов.



Д-р мед. Єраст М. Константинович

б. асыстент Держ. Шпиталя св. Лазаря в Кракові

ординує от 1. червня с. р.

в Мушині

ул. Пилсудекого Нр. 93

(дом г. Фр. Сикорского).

Што чути в світі.

Букарешт: Король Кароль румунський, кн. Павел, регент Югославії і Бенеш президент Чехословакиї усталили способи дійства на случай: 1.) если бы кто напал на котру с держав Малай Ентенты, 2.) если бы повернул до Австрії Габсбург Отто и 3.) если бы Венгры зажадали ревизии трактату. По той нараді собрал ся в Букарешті генеральний штаб Малай Ентенты в цілі уложена вучно пляну стратегичного и техничного.

Парыж: Французский парламент принял закон о 40 годинном тыждні роботы.

Відень: Орган „Чорного Фронта“ выходячий в Празі под назвом: „Революция німецка“ подає, же недалеко місцевости Бернау незнаны напастники стріляли на автомобиль, в котром іхал Гитлер. Гитлер вышол с замаху ціло, але шофера, котрый был подобный до Гитлера, напастники убили.

Положенє в Палестыні єст дальше небезпечне. Арабы приступили до организованой открытой домашной войны. В часі розрухов в Яффі обметали они бомбами много жидовских домов. Тепер введено там кару смерти и пожизненной вязницы за всякы замахы против войску и полициї, а также за нищенє публичного добра, як желізнодорожной комуникациї, дорог, телеграфов и т. д.

В Естонии, недалеко Талина вылетіла в воздух лаборатория при складі амуниции. Выбух был так сильный, же вокрух 4 километров вылетіли с окон всі шибы. Число убитых выносит 70, а раненых 300, в том єст много офицеров.

Брукселя: В Бельгии выбухла фаял штрайков. Роботники жадают подвисшения платні. Гдекотры фабрыкы обсаджено войском.

Токио: Японскы войсковы кругы сут занепокоєны тым, же Совіты розмістили на японской граници много войска. Япония жадає демилитаризации той граници и узалежнят от того заключенє пакту о неагресии. Японскы войсковы кругы подають, же Совіты сконцентровали на граници Манжукуо 10 дывизий піхоты, пару дывизий кавалерии, 900 самолетов, 700 чолгов, а также побудовали сильны укріпленя в районі Манчулі, Благовіщенска и Хабаровска. Крім того укріплено сильно Владивосток, а в порті сконцентровано 60 подводных лодок.

С Відня доносят, же румунский король, Кароль має в осени приїхати до Прагы в цілі заключеня милитарного договора медже Румуниом и Чехословакиом.

Мадрыт: Напруженє меже комунистами и анархистами в Испании довело до открытой домашной войны. В звязи с напруженым положенєм испанский парламент ухвалил оголосити военный стан на 1 місяц.

Відень: Дня 30 червня припадат рочница крвавых событий в Німеччині. Німецкы

власти предприняли далеко идучи средства осторожности, чтобы не допустить до какой нибудь акции со стороны организации „мстителей Рема“, котра числит тепер понад 20.000 членов. Организация тота заприсягла помстити смерть своего предводителя.

Москва: Дня 18 червня умер в Москві славный советский писатель Максим Горький в 68-ом року жия.

В Ковні в часі штрайку дошло до крвавых розрухов. Штрайкуючи роботники поуоставляли на улицах барыкады. Полиция выступила против толпы и почала стріляти с машинных карабинов. Убито 20-еро люда.

Канадский министр иде до Совітов.

Агенция „Юнайтед Прес“ подає, же канадский министр торговли Эйлер заявил, же в найблизшем тыждні выиде до Европы и вступит до С. С. С. Р. в цілі ознакомления с возможностями возобновления торговых отношений с Советском Росиом.

Англицко-Советскы морскы переговоры.

Рейтер доносит, же 18-го червня отбыло ся засіданє англицко-советской морской конференции, на котрой обсуджано техничны sprawy.

Вісти с краю.

Варшава: Пан Президент Р. П. заименовал амбасадором в Москві Д-ра В. Гржибовского.

В Кракові начал ся процес против 45-ом людам, оскарженым о розрухы в Кракові, якы мали місце дня 22. и 23. марта т. р. Малше оскарженыма єст 28 жидов.

Вильно: Польский турыстычный самолет помылил собі дорогу, перелетіл советску границу и осіл в Минску. При перелеті границы советский постерунок граничный стрілял до него.

Крыница: Дня 18. червня отбыла ся

в Крыници под председательством г-на воеводы Гноинского господарча конференция, посвячена справі Лемковщины. В той конференции приняло участь около 30-ох репрезентантов Министерств, админитрациных властей, Палаты Рольной и місцевого населеня. На коференции рішено предприняти міры, стремячи до господарчого оживления на Лемковщині.

Варшава: Дня 22. т. м. отбыла ся в Верховном Суді в Варшаві росправа в ділі убийства бл. п. министра Перацкого. На росправу тоту приїхало 3-ох украинских адвокатов со Львова.

До Картуз Березы вывезено с Торуня 4-ох люда, замішаных в комунистычной діяльности и организации беспорядков в Торуні.

До відомых читателей!

В КРЫНИЦІ-СЕЛІ У РЕВИЗОРА ЯНОВИЦКОГО

можна достати портреты Наумовича, Качковского и ин., реєстры членов, библиотечны книги, пєсы до представлень, серебряны тапергофскы значки, ТАЛЕРГОФ (образ) на шопну и другы книги до чит.

На приглашенє ревизор, яко делегат Центр. О-ва выїзджат на основанє чит. и на общи собрания.

ПОМІЩАЙТЕ

ОГОЛОШЕНЯ

В ГАЗЕТІ „ЛЕМКО“

КТО ХОЧЕ ЗАБЕЗПЕЧИТИ СЕБЕ НА СТАРОСТЬ И РОДИНУ

ОТ НУЖДЫ И ГОЛОДА, АБО ЗЛОЖИТИ ДІТЯМ ВІНО,

НЕХАЙ ЯКНАЙСКОРШЕ

заасекурує ся

в асекурацийном Товаристві

ВИТА И КРАКОВСКЕ

во ЛЬВОВІ

Асекурацию принимают на цілой Лемковщині
представителі: гг. Осиф Яновицкий — Крыница-Село и Михаил Перелом — Сянок.